



23. Aprili 2026

UPA2026/159

Ittoqqortoormiini umiarsualivissamik nutaamik Naalakkersuisut sanaartornissamut pilersaarusiornissamut (projektering) peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Mette Arge-Hammeken, Naleraq)

Nunatsinni umiarsualivinnut aserfallatsaaliinerinnarmut 270 mio. pallillugit kinguaattooruteqarpugut, nunatsinni sumiiffiit ikigisassaangillat umiarsualiveqarnikkut kinguussaaqqasorpassuusut, ilaalluunniit umiarsualiveqaratillu tulaffigineqarsinnaanatilluunniit. Aamma Ittoqqortoormiini pissutsit taamaatorluinnaq inissisimapput, taamaattumik siunnersuuteqartup tungavilersuinera Siumumiit paasisinnaalluarparput, aamma isumaqarpugut pisariaqavissuusoq sanaartorneqarnissaa piffissami qaninnerpaami.

Siumumit angorusupparput Nunatsinni umiarsualiviit ullutsinnut naleqquttut pisariaqartitagut sanaartorneqassasut. Pilersuiniarnikkut assartuussinikkut ineriartornermilu tamanik umiarsualiviit qitiusuummata. Siunnersuuteqartoq isumaqatigaatsigit umiarsualiveqarnikkut inerisaaneq sukkatsisartariaqaripput.

Siumup pingaartitaraa umiarsualiviit aqqissugassat pilersitassallu pilertornerusumik ingerlatissallugit. Aningaasat ineriartornermut atornerarlik sanaartorneq tamanut pitsaasumik kinguneqaqqullugu. Pineqaannangilaq sumiiffinni inuulluataarniutaassasut, pineqarportaaq pineqartuni angallannikkut attaveqaasersuinnikkut nunatsinnut ataqatigiisitsinissaq.

Nuannaarutigarpur Ittoqqortoormiini qallunaat silaannakkut angallannikkut attaveqaasersuineq pitsanngorsaaviginiarmassuk. Qanormi qujanartigissagaluarpa umiarsualiveqarneq ilanngullugu siunnerfigineqarsimasuuppat taamaalilluni pisussaaffik nunatsinnut aningaasatigut inissisimaneq eqqarsaatigalugu pilertornerusumik suliarineqarsinnaanera pisinnaammat.

Tamannali uniffigineqassanngilaq, Siumumiit pingaartikkatsigit aningaasanut inatsimmi isumaqatiginninniarnermi tamakku ilanngullugit qaqilerpavut. Assartuussinikkut pilersuinnikkullu iluatsittoqassappat ataqatigiisitsisariaqaratta attaveqaasersuutitigut aqqissuussinerput sukkatsisartariaqarparput.

Siumumiit isumaqarpugut nuna tamakkerlugu sulianik pimoorussamik aallartittariaqarluta, taamaattumik pilersaarummik anginerungaartumik suliaqartariaqarpugut, nunami tamakkerlugu umiarsualiveqarnikkut ajornartorsiuteqarpugut. Aserfallatsaaliinerarmut kiisalu nutaaliornermut pilersaarutit tigussaasut aallartittariaqalerpagut.

Siunnersuuteqartup siunnersuutaa paasilluarparput assortoruminaapporlu taamaattumik ilalerparput, taamaattorli nuna tamakkerlugu iliuusissatut periusissioornissaq Siumumiit siunnerfigineqartariaqartoq angisuumik eqqarsarluta suliaqartoqarnissaa ilanngullugu eqqartortariaqarparput. Siunnersuuteqartup



taasiffigisassatut siunnersaataa sakkukillingikkaluarlugu Siumumiit oqariartuutigisagut ilanngullugit
ataatsimiititaliami eqqartorluarlugillu nalilersorluarneqassasullu innersuussutigaarput.

Lars Poulsen, Siumut